

四庫全書

集部

欽定四庫全書

集部

鄖溪集卷一至三

詳校官庶吉士臣馬履泰

檢討臣何思鈞覆勘

謄錄舉人臣黃道熈

謄錄監生臣單可彝

謄錄貢生臣章松雲

欽定四庫全書

集部三

提要

鄭溪集二十八卷

別集類二宋

臣等謹案鄭溪集二十八卷宋鄭獬撰獬字毅夫安陸人皇祐五年進士第一通判陳州入直集賢院知制誥英宗即位數上疏論事出知荆南還判三班院神宗初召拜翰林學士權知開封府以不肯行新法忤王安石出知杭州

徙青州又力言青苗之害引疾提舉鴻慶宮  
卒事跡具宋史本傳初獬以進士較試於廷  
舍人劉敞得獬卷曰此文似皇甫湜獬嘗與  
敞書亦言韓退之時用文章雄立一世者獨  
李翱皇甫湜張籍耳然翱之文尚質而少工  
湜之文務實而不肆張籍歌行乃勝於詩至  
於他文不少見計亦在歌詩下使之質而工  
奇而肆則退之作也云云觀其所言知文章

宗旨實源出韓門矣宋志載鄭溪集五十卷  
淳熙十三年秦熈嘗序而刊之今已久佚惟  
從永樂大典內裒輯編次又以宋文鑑兩宗  
名賢小集諸書所載分類補入勒為二十八卷  
王得臣塵史稱鄭內翰久遊場屋詞藻振時  
唱名之日同試進士皆歎曰好狀元仁宗為  
慰悅本傳亦稱其文章豪偉峭整議論剴切  
精練民事今以所存諸作核之殆非虛美秦

煇序稱於論綏州見其計深慮遠於論毀譽  
見其居寵思危辨楊繪救祖無擇則特立不  
說隨今其文雖不盡傳然大槩亦可想見矣  
乾隆四十六年九月恭校上

總纂官

臣紀昀  
臣陸錫熊  
臣孫士毅

總校官  
臣陸費墀

原序

本朝鄭獬為人俊邁不羣舉進士第授將作監丞通判  
陳州召試直集賢院修起居注遂以右司諫知制誥京  
師大雨水詔求直言獬上疏曰臣竊觀陛下發德音下  
明詔以求忠言然臣愚未知陛下將欲實用之邪抑欲  
因災異舉應故事以文之邪苟欲文之則固無可議必  
欲實用之則于此時四方交章累疏繁叢委至而陛下  
以一日萬幾之餘未能周覽亦不過如平時章疏關機

密者則留中不出繫政體者則下中書屬兵機者則下樞密院兩府覆奏又以下羣有司及郡邑卒無所施行而後止如是則有求諫之名而無求諫之實所為應故事者等耳以臣所見謂宜選官置屬令專掌羣臣所上章疏日許兩府及近臣番休更直便殿坐與之從容條講其可者則熟究而行之不可則罷之有疑焉則廣詢而後決之使羣言得而衆事舉此應天之實也出知荆南府神宗即位除翰林學士知開封府王安石叅知政



事不悅解宰相富弼在告遂除解翰林侍讀學士知杭州府徙青州以疾提舉鴻慶宮卒右內相鄭公毅夫鄆溪集五十卷公之才行出處具見誌銘煇假守安陸得公集讀之其氣節高邁議論精確可考不誣於論綏州見其計深慮遠於論毀譽見其居寵思危若夫辨楊繪救祖無擇則特立不詭隨蓋曉然矣昔孔文舉謂盛孝章要是天下有名人如公之聲名赫然于世固不在孝章下而臨事實用復表表如是者使天假之年究其施

設當如何哉安陸公鄉里而公之文集不傳為郡者得  
無慙乎乃嗇公帑之用刊而寘諸校官將俾此邦人士  
知鄉之先達所立如此因以勸慕興起其於風教抑有  
補云淳熙丙午秋七月郡守建康秦煇書

鄖溪集原序考證

原序第二頁前六行 盛孝章盛原本作成案孔融集  
有薦盛孝章書成字誤今据改正



欽定四庫全書

鄭溪集卷一

宋鄭獬撰

制

觀文殿大學士富弼除依前尚書左僕射門下  
侍郎同中書門下平章事昭文館大學士兼譯  
經潤文使鄭國公制

門下東籙膺圖將繼配天之大業銓時論道必資名世  
之元臣以言乎體貌則舊德之英以言乎望實則羣材

之表爰立作相宜莫如公丕昭寵數之殊享告治朝之  
聽具官富弼智資大雅德懋碩膚學足以造聖人之微  
幾足以通天下之變繇賢科之得雋攄遠業以奏功在  
仁祖時則首冠廟堂有弼諧九德之美在英考世則再  
登樞府有折衝萬里之謀庶績已熙太平將洽屬留侯  
之多病容裴度以為藩愷悌所宜神明自復方王家之  
不造固賢者之有為昔居畎畝而志猶在於愛君今處  
朝廷而義豈忘於憂國是用召從方守進拜元台仍左

揆之舊班東臺之茂秩爰田衍賦盟府易勲茲實異  
恩庸昭注意於戲上理乎天工則日月星辰以之順下  
遂乎物宜則山川草木以之蕃近則諸夏仰德以承流  
遠則四夷傾風以待命凡予欲治惟爾責成勉盡嘉猷  
用光丕訓可

皇子和州防禦使樂安郡公仲糾可觀察使封  
國公仍賜名顥制

朕既即位賜封諸子下國褊陋厥名不稱非所以安彊

王室而厚吾仁愛之意也皇子某生而穎秀敏行日聞  
出就外傳不煩師訓是宜推擇名都以建爾于北方而  
進之以廉車之任俾長侯國嗚呼維善人乃可以為藩  
維宗子乃可以為城爾惟寵至益戒毋作隳德則庶乎  
為藩之固而城之不壞矣仍易之美名併示優異可

皇子博州防禦使大寧郡公仲格可觀察使封  
國公仍賜名額制

具官某昔周文王之子孫蓋為之宗者皆百世而不絕



朕維吾子之孝悌幼而有美志思所以蕃大本枝之屬  
乃詔丞相考圖按籍以定厥封崇之以連帥之任進之  
以上公之爵可為優渥矣爾維敏于學慎于習毋好佚  
豫毋侮老成惟時戒哉勿貽後羞仍賜令名庸示我休  
嘉之命可

三司使工部尚書可邊鎮節度使制

門下金鼓作乎昏明雷霆類乎威罰撫師以處則大國  
勢以銷未萌仗鉞而行則耀天誅而征不諛屬之統帥

我有能賢俾盡護於邊屯用交修於戎警輟吾司會往  
奠要藩洛爾羣工明聽嘉命具官某天資俊偉國所倚  
毗隤然文武之兼才展矣朝廷之重器純忠自立華髮  
不渝頃由起部之崇專莅大農之政萬貨畢入九賦咸  
均金錢演於泉流紅粟腐於露積蔚有美績暴於衆聞  
將大任於賢謀宜專司於將聞是用前諏嘉日誕布徽  
章建六纛以啓行擁萬兵而開府茲為異數併示優  
恩於戲授以中權蓋重腹心之寄控其遠馭無圖首

級之功勉盡壯猷遲聞殊効可

龍圖閣直學士知諫院趙抃可右諫議大夫叅

知政事制

鄭國之政創始於裨諶定論於世叔成文於子產舉而措諸民故無悔事况夫履四海之籍圖回萬變以佐予丞相之治者宜有通方亮直之臣為之叅貳具官某純明不雜金玉自昭至行足以美俗雅材足以經世建旆坤維有愷悌之化蜀民歌之伏蒲中禁嘉言諤諤以時

而入告朕識其公器可屬大事不謀於左右陞之諫輔  
俾佐廟堂以與夫二三舊德坐而環議或善謀以先之  
或能斷以後之質於古而不謬行於今而不跲相須而  
成施之天下遂無悔事豈惟鄭國之陪臣與之爭烈哉  
可

戶部尚書張方平可叅知政事制

叅議大政雖下丞相一等至於坐斷廟堂之論上則幹  
元化以調四時下則宅至仁以澤萬類近則羣元仰首

以承德遠則殊俗交臂以待命蓋與丞相之職業均焉  
其官某德性冲深撓之不濁高風秀氣灑落乎塵外在  
仁祖時發明大冊竦動天下結紳禁閭擁節藩垣出入  
三朝最為先進游談之助不至於前斷自朕心擢陪宰  
席書曰寧王遺我大寶龜紹天明即命夫龜以兆吉凶  
猶足以為寶况仁祖遺予以雋老哉往踐厥位汝其勿  
辭可

樞密直學士邵亢可樞密副使制

昔大禹受命伯益皋陶皆帝舜舊臣故禹有天下拱手而無掄獎之政今予不敏猥承大器二三論議之臣皆先皇帝所以遺予藉之成太平之業者也具官某高天興學竦聞當世風力勁邁足以經乎萬務佐予春坊忠論疊疊屬厭於上聽俾尹王府豪右屏跡予之求舊宜擢樞庭諫垣進拜可無訓言維高宗之命說曰股肱惟人良臣惟聖此上勉下之辭也維說之復王曰木從繩則正后從諫則聖此下諷上之辭也上下相飭至於大

治爾其伏念高宗之訓而予亦不忘傳說之言庶乎合謀同力拱揖乎穆清之上豈不休哉可

三司使吏部侍郎韓絳可樞密副使制

先皇帝付予以大器四海內外至於夷貊昆蟲之類莫不仰首傾耳以需朕之號令德澤其可懼哉其可畏哉維是一二夾輔之臣謀謨左右共濟太平則庶夫有以副先皇帝之遺志耳具官某高材敏識善斷而不回試之劇要風采益峻大農之政飫乎衆聞固足以入贊樞

廷以成萬機之務夫為君難為臣不易予以先皇帝付之大器而又擇爾以共持之其不為難且不易哉爾其以仁恕公忠佐天下俾予無疵政則孰能間爾之功哉可

工部郎中知制誥王安石可翰林學士制

文王有四友孔子曰自吾得回門人益親亦有四友焉維予之翰林先生文章議論以輔不逮者蓋為先後左右之臣矣具官某學為世師行為人表廉於自進優處



於東藩茲有僉言宜還中禁俾夫左右先後以道義輔  
於予豈特專文墨視草而已哉可

知制誥可翰林學士制

昔漢武帝尊儒學問子虛而歎息於是嚴助徐樂之徒  
攝袂而起我仁考皇帝以文章取將相故英傑豪偉之  
士釋芒屨解絰褐而摩肩乎玉堂之上今爾某乃吾仁  
考用文章選中甲科既亦試吏風績蔚然及在掖垣代  
予號令訓辭深厚有西漢之風格宜置之金鑾以備謨

議爾其以古之賢人君子事業以開道予于治豈特為  
嚴助徐樂文章諷議而已哉可

翰林學士給事中王珪可承旨制

唐學士六人而年德最茂者遷為承旨深謀祕論率得  
預聞當時諸公由此以攝大柄者踵相躡也具官某風  
華秀整處謙履順文章雄駛如羣馬之四馳更直玉堂  
已踰一紀比之數子乃為舊德進承密詔僉曰然哉朕  
方以乾剛斷天下又得爾老筆輔之風飛霆擊以令四

方其孰有不從哉可

知制誥制

號令所以鼓舞萬民一言為慶賞則天下莫不砥名礪節矯然思所以為善也一言為刑戮則天下莫不剗心剔慮懔然思所以去惡也天何言哉惟予左右之臣實代予言某官某績文毓德為世望人珥筆螭陛之下以書言動蓋亦勤矣乃召試于政事堂訓辭深厚可用為余代言之任揚子曰商書灝灝爾周書噩噩爾俾予之

誥命灝灝而且夷大也噩噩而且明察也兼商周之美而成之書屬汝而後備焉可

侍讀制二首

入則聞正言出則行正道此古聖王所以闡切約束自致于善也况朕之涉道未深思得宏博通敏之士為之講解以爾禁林舊老學有師法宜入侍帷幄發明大義俾朕究知古聖王塞亂致治之源庶幾聞正言行正道由爾之勸講成之也可

朕嘗觀古史自聖帝明王暴亂之君莫不具載燦然如  
觀星火然多聞闕疑孰從而質問宜有博碩之師明其  
大義以爾儒林之老通於古學久直禁闥朕所倚重其  
入侍金華以誦古史為朕講明前世聖帝所以致治之  
源而暴君所以傾亂之繇以昔鑒今日之得失可不勉  
與可

太子家令率更令制

家令治刑獄穀貨率更令治殿門刻漏皆屬詹事府以

備司存以爾謹善老於儒學並次新秩進之然則鼂錯嘗居此官以政術顯是不獨專於沉務而已可

秘書丞制

魏置秘書令及丞以待文學博通之士故前世謂之天下清官今者亦自蘭臺著作之局廼得領職猶足以異乎常選者矣惟爾材業明茂嘗以治邑有聲使者言狀遂掌史氏三載奏課復授以清官其不為榮寵乎可

太子賓客制

朕既擇其師傳皆鼎鉉調元之臣乃朕碩德之老然而位尊德重燕見有時至於遊衍相講習則宜得端士為之賓從具官某道德深醇有不肅之訓嘗侍禁闥老而彌謹其令與吾子游以備四客調護之義可

太子司議郎制

進善有旌誹謗有木記過有史徹膳有宰則尚何職於司議哉蓋道太子之善者欲其起居左右前後無不得其正也具官某致忠於國守節不傾屢更朝綴人稱其

能今以為司議用典箴誠昔馬周恨不居此官今爾之  
被選可以無太息矣可

東宮官制

士之生未有不須友以成之者今吾子幼而向學方有  
立志以爾諄諄者艾行方而學醇可謂有師友之法矣  
俾夫與吾兒遊言而聞正道動而行正事少而習焉長  
有成德非爾之功誰邪可

雜學士制



濯濯之麟儀儀之鳳集我靈囿以為王者之嘉瑞惟朕  
之有文章議論之臣有在予左右者若某道業精深通  
於治國家之體某祖德師經明於古人之變並處禁垣  
蚤夜不懈寢成挾維之功朕甚嘉之其遷某以某官遷  
某以某官以德詔爵孰謂不然方朕之憂得賢者以為  
嘉瑞詎比夫濯濯之麟儀儀之鳳而已哉可

學士出鎮制

爾以文章諷議出入玉堂之署燕見紬繹詭辭密對飲

聞于朕聽而厭直承明之廬拜章懇懇願以試郡自效  
惟東平之區南負梁山北並鉅野土衍而民淳足以卧  
治乃易金華之美號而往莅焉昔嚴助請守會稽數年  
不聞問武帝以璽書讓之以爾之才固足以辦一郡勉  
樹休績朕當以璽書褒之以詘夫漢之侍從之臣有不  
能者矣可

起居舍人制

前世謂左右史正用第一流其選大精於尚書郎蓋執

筆天子庭下以記言動較之古人則史佚董狐之職業也今爾某文詞清興得雋甲科入直西掖以王言鼓動天下揆其才美宜以右史處之與夫前世之論第一流者吾無所媿耳可

穎王府翊善守太常少卿直昭文館齊恢可守  
尚書左司郎中依前直昭文兼太子左諭德諸  
王府記室叅軍尚書司封員外郎直集賢院陳  
薦可工部郎中依前直集賢院太子右諭德制

唐制左右諭德掌諭太子以道德其內外庶政有司為規諷者隨事而贊論焉則處其官者其選可以不重哉以爾恢清謹廉正不失其常以爾薦質直和厚可任以事而或入道經訓或贊為書記使王有聞緊爾能力屬儲闈之肇啟擇郎曹而並進夫語道者非序而安取論德者惟行之為艱毋或易言以墜予訓可

龍圖閣直學士知河南府韓贄知鄭州祖無擇  
應奉山陵加恩制

英考皇帝馭飛龍以昇真藏衣冠於橋山萬國攬涕竭  
蹶以趨事而一二藩輔之臣實奮厥績予嘉爾勞茲有  
優數維汝摯敏於行實濟之以夙給而司洛都之管籥  
維汝無擇老於辭學將之以仁厚而擁園田之麾節各  
率所部協力以赴功米鹽精密無所漏遺廟祔已安宜  
疇慶典增國舊封衍之真食以庸制祿茲非懋賞之公  
乎可

給事中可禮部侍郎制

朕即政之初思欲考禮之文與其古今損益之數著為大典副於有司其孰能任予之事而為小宗伯者哉丞相以爾某性寬而莊重居簡而有廉隅老成之德可以為世師鄉以序擢入拜青瑣而間燕賜對數有嘉論據經引義皆究本元宜可以奉明詔司大禮為少宗伯朕曰俞哉夫禮失久矣三代之純懿朕不得揖讓乎其間爾其摘去訛俗附以古文俾不詭於時義朕將執之以從事焉可

給事中可工部侍郎制

臯陶之謨九德曰日宣三德夙夜浚明有家謂能行三德則可任卿大夫以爾純忠勁節剛強而有立合臯陶之慮是可以為卿大夫矣起部副郎亦古之卿職也歲次序遷往踐爾位無忘浚明之誠焉可

右正言知制誥滕甫可右諫議大夫擢御史中丞制

漢武不冠不見汲黯以萬乘之威而猶尊禮之況淮南

之叛王乎然朕竊怪漢武不任黯以御史大夫止於主  
爵都尉而已豈真直道之難行獨見遺於盛世邪具官  
某閔才勁氣獨立無朋演訓西垣兼資諫列引議慷慨  
動中事機俾朕聰明徹乎萬里宜進秩於東臺以長憲  
府夫猛獸在山藜藿為之不採爾其奮勵骨鯁橫身朝  
廷助獨斷之大權闢衆正之夷路思報殊恩無憚後害  
如是則朕豈遺歎於汲黯哉可

中書舍人除御史中丞制



昔貢禹為御史大夫忠言蹇蹇書數十上時稱其質直  
傳宣為御史中丞明法繩下朝廷震肅人服其有威朕  
嘗重此二人以為真稱其職矣以爾某學純行修騫然  
介立不為利誅不為勢懾有古君子之操向處西掖典  
治誥命俾朕之言雷行而風動取信於四方者惟爾之  
能今擢之執憲以長乎烏府僉曰俞哉夫雖舜之聖猶  
上下相戒飭爾其拂邪納忠於內如貢禹焉夫雖堯之  
明猶賢不肖雜處爾其摧擊姦豪於外如傳宣焉俾朕

不為受印之羞豈不休哉可

諫官制五首

拾遺品雖微而任莫重焉朝廷之得失天下之利病皆得以抗言而論夫舉朝廷天下之事以責之非為任重者邪才能勝其責則其施設於當然者猶有餘力否則官雖在七品猶為高位矣以爾忠直介立侃然不回宜可以任其責其以某為右正言可

某嘗以直言極諫對策於大廷下忠論疊疊陳指世政

直出諸生之右朕嘗志之今諫列有缺擇之於衆豈可  
先他人而後汝邪既以直言極諫充其科又以正言踐  
其職可謂有名實矣爾其發憤吐瀉披露得失毋忝爾  
科毋隳爾職以稱朕之夙志焉可

朕嘗怪武帝以汲黯之質直而不用為諫大夫俾之出  
入禁闥補過拾遺以副黯之所願乃出為淮陽守朕甚  
少之以爾性寬而莊重居簡而有廉隅入直西掖發其  
辭令數有駁議今茲遷次又以諫大夫處之既授以紫

垣之秩而兼以議論之職庶乎朕於帷幄之臣可謂無遺歎矣可

舜為漆器禹雕其俎諫者十餘人漆器雕俎小過也何其諫者之相屬也然不若是不足以為舜禹後世之過有甚雕俎者然其折檻引裾蓋亦曠世而一有焉况朕之不明不敏猥承大器豈自必於無過哉此朕之所以蚤夜而懼恐者也以爾俊茂脩潔濟之以經術命以司諫以補不逮朕之過失有如雕俎者爾其引義極言無

有所諱夫以舜禹之心事於君其有不為忠臣者耶可  
古之聖王懼其不逮必求骨鯁之士俾之盡言於是  
有引裾折檻叩頭丹墀之士以致其直某官某深於  
儒學明悟強正可以處諫列以司朕過無為默默以  
取愧於古人也可

侍御史制

朕以某方正有經術能處大事乃任以為御史中丞  
朝廷以直為宜今中丞言爾介立無朋不畏彊禦可  
中侍

御史朝廷亦以為宜夫以朕之知某遂為稱職中丞錄  
中丞之言從而任卿其亦為稱職御史邪可

御史制

侍御史國之司直督視不法以肅朝廷以爾骨鯁盡節  
心不外顧可以執白簡以任御史之職昔侯文為東部  
督郵京兆尹劾之以為鷹隼始擊當取姦惡以成嚴霜  
之威況為朕之司直者邪秋氣至矣御史亦可以擊矣  
勉哉毋為東部督郵之羞可

御史知雜制

御史冠法冠以察不法蓋已為雄重矣而知雜事獨據南牀衆御史下之不得抗席則其風采之震薄尤可憚已某挺身檢行折而不撓向在言職引義慷慨愕愕有爭臣之風今擢處憲府總其雜事可謂有素節矣爾其據正彈畫肅清京師以稱御史之職焉可





欽定四庫全書

鄖溪集卷二

宋 鄭獬 撰

制

皇伯章德軍節度使濮國公宗樸可檢校左僕  
射同中書門下平章事充彰德軍節度使濮國

公制

門下朕膺符赤伏之靈繼序炎精之烈圖本支之盤固  
倚形勢之挾維示天下以強則周世饗懷柔之治教天

下以睦則堯民陶於變之風繫我宗藩推尊帝室雖懋帥  
旄之寵未參公衮之華乎告大庭踐敷顯命具官某器  
含廉靜德履端純聳俊望以高騫奮雄才而獨秀玉符  
傳瑞拜於上將之壇金輅啟封胙以先王之國肆予纘  
武霈灑湛恩豈於懿戚之賢獨被褒章之晚是用載涓  
剛日特峻彝儀秩魚揆路之榮位躡宰庭之貴衍疏真  
食增煥隆名於戲盟載冊書尚推同姓之長賜均寶玉  
况如伯父之尊立愛自親承流及遠協成美化勉著休

聲可

皇兄宿州觀察使宗懿可封濟國公制

朕惟聖祖神宗之子孫頌然而在列者咸得以分茅胙土以世相及所以明親親褒進有德以示宗寶之蕃盛皇兄具官某神宗之後而安懿王之長子友愛之德稱於其家乃以東方之社建爾於歷陽用繼先王之餘烈爾其悉心務德迺惠迺順以作藩輔無隳我之休命可  
皇伯集慶軍節度使檢校尚書左僕射兼御史

大夫上柱國號國公宗諤南郊加食邑功臣制  
門下圓陞薦嘉禮接三神之奧端闡乎號澤涵一氣之  
和下漸乎跂行喙息之微遠暨乎卉服穹居之長矧予  
懿屬為世顯侯宜煥發於宸章用鋪昭於靈祉皇伯具  
官某惠心孚物雋德兼人嶷如屏翰之強鬱然宗室之  
望方欽柴而展采嘗委佩以相儀雖雖來止之容翼翼  
盡恭之意輔成鉅典宜茂沈思既有嘉冊以啟金輅之  
封豈無顯號以賁龍旂之績兼倍增於書社併敷告於

治庭於戲上帝之嚴維烈祖是侑上天之貺維伯父是膺不獨講明惠之文又以著展親之義勉思率履以光寵名可

皇弟左武衛大將軍建州刺史克闢贈觀察使  
右監門衛大將軍克貴贈防禦使並封侯制

朕惟兄弟飲酒之飲升堂而相樂所以明恩義之厚況夫奄忽長謝得不為之慘怛出涕而又思有以褒其遺美而賁之幽壤庶乎以極哀榮之致焉皇弟某生于予

家信厚而自立靖恭以持位足享耆耄而忽先朝露與物而代去朕甚悼之其以廉車禦侮之優秩並開侯社用申祿典之重九原可作汝其歆受可

皇姪克溫可贈洺州防禦使追封廣平侯制

勅王者惇睦九族以致萬國之和朕惟本支之隆驩然接存之愛靡不篤也惻然哀往之禮靡不厚也所以廣親親之道而率之天下也具官某承世德之楫參時哲之良威儀穆于內朝行義推于宗屏謂享遐福以榮天

枝忽聞訃音用震黼宸加兵防之贈祿啟侯社之追封緬  
惟幽途歆我愍典可

皇姪世儀可贈郢州防禦使追封富水侯制

勅王者推親親之道所以厚天下之風也予傷本支憑  
世系之慶列宗藩之英務學自篤休有文雅之問樂善  
亡厭居遠華靡之習茫乎孰宰命至奄謝祿以兵防之  
秩直以侯社之封泉途可榮尚克歆命可

皇姪宗魯可贈徐州觀察使追封彭城侯制

勅王者立愛自親始所以教天下之睦朕于骨肉之義  
粲而不殊故寵有以厚存而哀有以飾終也故具官某  
表儀宗藩肅雍朝禁遽茲奄忽良用盡傷遂以庶車之制  
徹茲侯社之封營魂有知歆予追惻可

皇兄左衛將軍開州刺史仲行贈虔州觀察使  
南康侯制

詩有之死喪之威兄弟孔懷而予之伯氏奄先朝露乘  
代而逝豈有不懷者哉具官某信厚自修動而不踰禮



方期耆齒以藩王室天報不腆遽聞傾殞臨朝撫几為之哀愴秋以廉車之雄爵以通侯之貴併為優數以綏其歿親之厚茲予所以懷之也可

景靈宮使昭德軍節度使開府儀同三司檢校  
太尉兼侍中上柱國金鄉郡開國公曹佺南郊  
加食邑制

門下朕撫皇器之初攬紫庭之議在漢則即位而見祖  
於唐則踰年而命郊欽維真廟之紹休亦建泰壇而肇

祀肆余昧德敢廢彛經載探越紉之文恭勅射牲之典  
維天錫羨與爾共縻具官某體醇茂之姿涵夷雅之量  
燕山紀伐廟藏累世之勲沙麓儲靈家擅外姻之貴適  
黃鍾之萌氣飭蒼輅以報天陽燎升而精意孚俎豆徹  
而美祥兆溢為嘉澤燦若褒章有懿號以茂功有豐租  
以陪邑於戲寶鼎神策靈符方賜於漢庭乘馬路車顯  
命宜褒于申伯茲實上穹之況匪曰冲人之私元舅勿  
辭往踐寵數可

皇弟泰寧鎮海等軍節度使檢校太尉中書門  
下平章事岐王顥南郊加食邑制

門下辰臨測景之圭躬即禮神之圀積燎乎高丘而事  
君之義顯薦鬯乎太室而事親之教行既歆予以絜誠  
又錫予以嘉福函蒙四海發育萬靈顧盼嚮之來成敢  
積重而專有具官某德隅嚴峙仁範渾深雖鴈序之  
和韡韡棣華之秀屬初禋之受紱陪朝踐以奠觴維天  
地所以享一德之誠維祖宗所以懷大孝之美實資顯

相遂底嘉成豈無展玉之恩固有錫膳之澤增茂功於  
盟府衍多賦於爰田光我邦家莫如兄弟於戲白麟游  
時已膺元狩之符丹鳳鳴山更進岐陽之律震靈光而  
下浹揚乎號以肆行勉圖磐石之勲共起安瀾之治可  
皇伯祖鳳翔雄武等軍節度開府儀同三司守  
太保兼中書令判大宗正事東平郡王久弼起  
復制

門下居喪不可凌節雖重於親憂於義有以斷恩亦先

於王事維內朝之雋老冠王室之英藩將圖磐石之勲  
宜講墨綬之制載班顯冊特渙豐恩皇伯祖具官某信  
厚褻身靜專毓德蓋出神明之裔最為戚屬之尊樂善  
不厭服東平之茂矩事親稱孝資高密之純誠保有令  
名謁聞衆聽屬茲鉅痛累爾戚容甫周卒哭之期盍舉  
從權之禮進登帥閭兼衛周廬凡在寵名悉其舊次於  
戲漢廷作鎮方推劉氏之宗魯國奪喪何必徐戎之急  
蓋展親於天族庶修睦於民彝服我褒華永資夾輔可

太原府兵馬鈐轄制

大鹵之西北與羌夷接其俗勁悍聞桴鼓之警言則攝弓而起惟恐其後羌騎憚之不敢南向而馳故朕常擢土人之豪傑為之將領以禦侮佚具官某忠義奮發習於武事嘗用才氣雄於邊鄙經略使某奏課來上茂績著焉不有甄擢何以勸後乃以左帑之使俾轄戎事修爾戈矛以同王之所仇焉可

帥臣制

立秋而鷹隼擊秋分而微霜降遣師命將仗鉞而行所以順肅殺之氣而成暴亂之誅也具官某策勲王府忠勇無前更踐會藩兵政咸肅惟鬼輿之分涇水上游西控朔方以捍羌衆乃進以團結之任為朕藩屏若闐然鼓之使赴敵之士爭死先驅不見白刃之險者此其素習也秋風至矣暴揚我威武以謹察夫為暴慢者焉可

夏竦制

朕夙設右府以制武師考諸典刑蓋六卿司馬之任本

之輔相為三事大夫之崇眷遇惟勤尊顯兼極具官夏竦學  
貫文武識通天人明足以斷大疑知足以任大事被遇  
先聖首中異科慷慨名卿之言雍容近輔之秀逮朕紹  
服歷踐柄司材謀遠出於諸臣論議有補於當世進退  
一節勤勞百為略平函夏之交則裔夷執玉綏靖大河  
之北則邊堠戢戈威名懔聞民譽允洽是用斷自朕志  
召登機衡遇流議於風波定成契於金石仍中軍之旄  
鉞兼上宰之印章褒進寵名加陪賦邑寵光渥緝恩意



敦隆於戲為君之難知臣匪易任惟勿貳初必有終圖  
用舊人朕既稽於前憲肇謀王體爾當究於治功俞往  
欽哉祗服休命可

罷夏竦制

若時名器之重惟兼將相之隆雖中外之勢殊而股肱  
之體合以爾耆德挺揚大廷具官夏竦學通古今材憲  
文武造形之識符著策以前知決慮之精若利兵之必  
斷蚤經謀於二府嘗宣績於四方事勞實多夷險同致

比付樞機之務載勤夙夜之心顧備罄於猷為抑久煩  
於志力宜從休秩庸厚老成往分留鑰之都進視帥垣  
之秩褒功衍食並峻等威於戲進而屬之鈞衡以爾才  
且舊退則極於寵祿俾爾壽而昌遇臣之恩在予無愧可

夏竦樞密使制

出殿藩垣是謀長帥入經王務實賴近臣矧夫帷幄之  
嚴蓋均衡弼之選宜孚廷告庸對朝僉具官夏竦業茂  
經綸學通精稔早事聖考嘗更要途肆朕纂承愈益親

近向分推轂之寄且著撫邊之勤偃息便藩倏忽采歲  
眷言右府思任舊人庶資經國之謀以務戢兵之要地  
官還秩并賦敦封賜號褒功併推異數於戲勞師用武  
未免於邊虞務德懷戎日恢於廟略勉圖忠盡庸答恩  
華可

除韓琦制

惟幾成務聖人所以體至神以爵舉賢羣士所以濟大  
業矧夫樞筦之任均於廊廟之謀必詢僉言審用材傑

迺揚顯號以示至公具官韓琦器識精深機神爽邁早  
繇俊造之選擢升高妙之科列於爭臣寘諸禁掖不汲  
汲於榮寵能審審於誠心嚮以羌人弗賓西疆謀帥往  
護諸將以寧一方入經帷幄之猷出領翰垣之寄歲月  
洊易事勞居多宜輟司於計文且來遵於密命優其視  
秩崇以褒功加地益封並隆彛數於戲萬機論政實圖  
朝夕之咨右府本兵尤重安危之計毗予治者維爾力  
之可

樞密承旨左監門衛將軍任承睿可樞密都承旨制

朕舉天下之機事統之西府而諸曹就列必有屬長以奉乎旨命以汝持身蒞職稱為廉敏殆歷三朝至于耆艾閱其勞舊宜有以序遷褒寵之澤爾其祇服無怠可  
瓊州監押李文仲酬獎可內殿丞制

本道使者言汝護兵於瓊管海夷錯居安而不擾秩滿第課請如甲令加賜夫惟信賞必罰確若金石朕方執

此以礪世焉其勿從可乎可

大理寺丞蘇軾可殿中丞制

汝以高文大冊伏對於大庭忠言俊氣直出諸生之右  
宜擢之不次絕羣而進尚可歲月之累耶夫奏言試功  
大舜之所以治也凡汝所言者朕既得之而其所試者  
今又載於有司稍遷以通籍勉爾志業以需不次之澤  
可

大理寺丞致仕朱臨可殿中丞制

爾以文中科不顧斗粟之祿去而歸故鄉從容乎湖山之樂不亦高乎屬茲均澤進秩一等此赦令也而爾之齒甚壯尚不欲撓之以吏職者亦將遂爾之雅操焉可

### 三司使制

某官某朕嘗以為翰林之職高文大冊為當世宗工嘗任以開封尹桴鼓稀聞為三輔第一更履內外可謂有成績矣今三司使既已進輔大政當擇能者以為代考之於羣臣無以易卿者方朝廷功役衆興常賦蹶而不能

給天下之利其必有遺落而不收者矣爾其專思熟計發明大冊撥其利源而更濬之使夫金錢紅粟流衍乎路衢而積滿乎府庫以足縣官之費可不為大功也邪勉哉其恭承朕之明命可

兵部尚書可三司使制

古者諸侯各食其賦故司會之職為簡而易舉由漢而來天下斗粟尺布之出納一歸于大司農則非夫聰明彊力深通夫儒術者居之則百利之源或幾乎涸矣具



官某雅德淑問溢於當時大事能斷先帝器之向以大  
司馬之任總治七兵而戎容武節赫然四馳今大司農  
缺遴選於衆毋易於汝者方朕之踐阼賜予之廣陵寢  
之役大費並出爾其通有無之數均發斂之期上以實  
吾國下以裕吾民俾夫萬貨之多其出如泉源其積如  
丘山糞壤之間皆有餘幣則朕馮几以觀天下富庸非  
汝之力邪可

三司判官制五首

朕嘗考郡臣之能籍其高第者志之以備臺省乃得某  
明智自將深於應務某忠樸不阿長於持正此皆朕之  
高第者也今司會缺員釋此而不取更欲外求耶爾其  
往佐度支鹽鐵之職謹守財賦無虛朕之命籍焉可

荀子有言儒術行而天下富然後昆蟲萬物生其間可  
以相食養者不可勝數也今舉四海之積藏之於公府  
僅能當歲計或不足則斂之於民豈操其術者非邪以  
汝明白有知數深於古今治亂乃用客擇任為大司農

之屬官調其度量演其籌筭以深思致天下之富焉可  
食出於田貨出於山澤財用之源也暴征之則下竭薄  
取之則上不給量其出入之度以操其術者在吾司會  
之府焉以汝才數周敏過絕於人將漕淮右京師之積  
有羨今用以佐吾司會必能演籌筭調其盈虛上積於  
公府下溢於民室以副吾之選擇焉可

舊制三司屬官缺大司農得以擇其能者而次補之今  
三司使某言爾之才明白強力長於治劇可用為屬官

夫大司農朕之所舉也所舉惟其賢則賢者必能推其類而進之安可不聽大司農之言哉可

朕嘗用某官為三司使思得才能強濟之士以佐其治迺下丞相府俾擇其人丞相言爾通敏無滯可用為判官惟朕既能選三司使而無廢職今丞相又能擇其屬官則天下之大計可以無憂矣可

四廂指揮使制二首

漢以中郎將掌三署郎執戟宿衛於殿廬今虎旅之都

帥猶漢之中郎將爾嘗以忠謹佐騎兵環徽道而侍夙  
夜有勞宜用次補以副衛將軍之職昔楊惲為郎將罷  
山郎移薦舉高第三署郎莫不自厲爾其嚴法令明白  
善惡以率其不恪庶乎朕期爾於楊中郎也可

今之提虎旅以直嚴更之署者猶漢之左右羽林之制  
武服之臣最為要官某沉毅而斷通於兵制攝弓撫劍  
以障河隴之戍蓋有能名俾陞刺部入掌羽衛擁虎戟  
以護建章勉圖忠效富貴之漸行來逼人矣可

功臣後制三首

朕之烈祖被戎衣以取天下其躡風雲而起者皆豪傑  
不世之士奇謀偉跡鏤於丹書嗚呼古矣朕不可得而  
見也思見其子孫之賢者將尊榮之以繼其風烈某沈  
毅忠密出入禁闥逮事先皇帝功効明白而滯於使列  
既已久矣其增以部刺史之秩以旌其能爾其修慎勉  
力以纂其祖功如召虎之於召伯也不亦美乎可

王公大臣之後竟零落而不聞者朕甚憫焉故於郊祀

赦書俾求其嫡系且將推祿以及之如聞爾等修潔皆  
為佳公子此真朕之所欲得也無以一命為薄爾其勉  
圖忠力高爵厚祿朕所不敢私吝也可

粵十一月甲子朕躬執遵豆以見烈祖神宗於大廟伏  
思創業之際二三佐命元老其后世廢絕亡一人在祿  
籍者朕蓋傷之是用申命俾求其後乃得爾等並以一  
命俾之登仕昔楚王思子文之功曰子文無後何以勸  
善朕亦將勸臣下之為善者也可

祁州防禦使知代州劉永年可廊延路副總管

制

高奴之屯帶甲百金之士十餘萬以捍西羌屬之才武兼護一道折衝制勝以贊夫元帥而左右之以爾具官某忠厚有謀事至而能斷析符代北風聲懾乎外境屬茲易帥宜用進褒夫厚而不能使愛而不能令譬如驕子不可以用此正今日之通患也爾其勵之以勇肅之以威進退死生在我而已豈非善耶可



欽定四庫全書

鄭溪集卷三

宋 鄭獬 撰

制

郎官制

某官某精明能斷而人服其才某官某通博有文而世  
稱其孝各以風績列於郎署有司奏課謂宜賜秩惟職  
方氏掌九州之圖惟中都佐司隸以察不法並為前世  
之要官亦足以為寵數矣可

戶部郎中天章閣待制劉元瑜可左司郎中制  
爵賞之公自貴者始今夫文章諷議迭居乎內外者皆  
爲士大夫之望閱歲浸久濡滯而未遷則何以勸于下  
哉具官某風力開濟動必解其理踐服衆職雅爲先進  
計其功狀蓋有藩輔宣化之勞俾升都公以貳左轄庶  
乎朕之爵賞仁于貴者以示于下其亦有勸者乎可

發運使可兵部郎中制

劉晏典漕事常曰一粒不運願負米以先趨其自任如

此今京師之餉畢出于東南故擇爾領使粟行數千里而無膠舟之害京師充實可謂有勞矣歲滿遷秩其以七兵郎處之勉思職業自任之重如劉晏朕何患無宿飽之師哉可

屯田郎中祝諮作坊酬獎可都官郎中制

甲不堅密與袒裼同射不中遠與亡矢同汝以才敏總治衆巧齊金鍛草莫不精利畜之武庫足以待國事而威四方古者治不去兵安不忘戰茲朕所以進爾以美

秩也可

三司度支判官兵部員外郎祕閣校理李大臨  
可工部郎中制

爾以文辭中第遂更事任佐吾大司農之職取贏化滯  
本用強而不屈有司稽其最于法當遷起部清曹事膺  
寵命凡汝之強學力行將致其所有于人者已嘗忘之  
矣尚煩朕之爲訓邪可

禮部員外郎御史知雜事龔鼎臣可吏部郎中

制

先帝以爾敦敏有經術不爲豪勢所屈擢居御史府以知雜事持重守義務通大體時有所發則中外莫不憚服豈惟先帝爲知人哉雖朕亦以汝爲識所任矣夫仕至尚書郎皆爲顯官而多不得居首曹今汝以御史之重兼首曹之選以榮制祿可謂充其德矣可

近侍加吏部郎中制

晉文帝嘗求吏部郎或以裴楷王戎進然而獨用楷則

戎者猶以爲少耶今吏部郎雖不領職以其冠左曹之首非道德侍從之臣不得參焉以某淹通有雅識出入禁林高文大冊爲朝廷光歲次宜遷乃以吏部郎處之使之在晉文之朝亦必置戎而授矣可

吏部郎中制

尚書郎皆爲妙選然多不得居首曹惟才哲之美委于事任者乃得居之以爾明勁不撓屢更器使付以淮右百城震懾嶄然並見其風力齎課來上乃用吏曹郎處

之可謂才與職稱矣可

度支郎中致仕李宗易可司封郎中制

壽祺之老以年引去超然自遂乎逍遙之境者雖寵辱之不能及逮予之履位可無汎澤以嘉其素尚乎具官某履夷處順風塵不雜解紱而歸嘯詠乎樽酒之樂適茲大賚進秩名曹寵命儻來尚不爲鄉里之榮乎可

水部郎中劉緬四人改官制

尚書郎更直建禮門奉常博士出導來輿是皆古之美

官廉俊喬雅之士多居之今爾等宿道修方見於治狀  
以時次補宜選之美官既已加賜又需汝之奏功焉耳  
可

職方員外郎周草可屯田郎制

先帝遷玉座于壽陵羣司犇走以率厥職暴露草次夙  
夜之勞茲亦久矣以汝懇心奮力敏以趨事復土告成  
相府上其功予惟汝嘉賜秩田曹祗復優數以昭我大  
孝之烈可



司門員外郎分司李微之可庫部員外郎制

爾有嘉材敏識服次郎省年髮未衰屏處乎廬阜之下  
可尚也哉朕之即政澤漸乎動植况茲留務易退之臣  
得無增秩之賜乎介爾壽祺以永我之榮命可

都官員外郎謝鴻知瓊州可職方員外郎制

瓊管距中土萬里環以大海孤居於風濤絕險之間朝  
廷嘗飭使者擇本道能吏以爲之守及其罷歸則又第  
其功狀而加秩一等今汝任職三歲爲治有條次馴伏

黎蠻遠人蘇息顧汝之勞應詔條可遷且明吾賞罰之功不遺乎萬里之外矣可

屯田員外郎任逸可都官員外郎制

尚書謂之文昌天府漢選孝廉之能文者以爲郎隋始置外郎或釐其曹事今考次而陞者蓋異乎古法而特以歲遷爾然爾之敦實清修治官有善狀課在有司亦不可以掩程能授職是猶不爲高選者哉可

比部員外郎知維州蕭渤可駕部員外郎制

汝以精明達于爲政遂佩左符以長乎北海阡陌靜安  
無桴鼓之警有司較年遷以司駕漢世二千石有殊績  
者咸被褒異勉爾職業增秩賜金行復至矣可

太常博士祕閣校理雍子方可祠部員外郎制  
豪雋之士羣居於冊府講究藝文養其美德茲所以備  
天下之器使也以爾資性端敏秀于西州以文中科遂  
遊東觀尚書典詞今爲名曹此累日之遷也如其器使  
則朕將爲爾圖之可

知西山保州董允仲可檢校戶部尚書制

朕之初踐阼德澤浸於無垠東漸乎日域西浹乎月窟  
罔有不及而況蜀土之徼縻我爵號歲奉琛賫而來庭  
者哉具官某以才武之雄授節西土綏撫族類不渝不  
震胥附而面內適茲大賚思被寵光將誇美于有衆朕  
甚嘉之夫賞贏金而賜龜綬蓋倣古焉宜用進秩以榮  
我之休命可

綿州錄事參軍杜鎬加檢校水部員外郎制

先帝躬執豆籩以饗上帝斂時福禧用錫于天下汝惟服案爲郡紀綱掾請如詔書俾均優澤水曹視秩往其祗踐毋怠可

少府監劉允中可司農卿制

舜之命稷曰黎民阻饑播時百穀司農之任也蓋自舜時已在二十有二人之列今雖失其職而挈名在籍猶居三品可不謂之尊顯哉以汝服勞王采治行有聞剖符西土吏民服其教予維汝嘉遷汝農正勉思祗服以

永來譽可

大理少卿制

舜爲君臯陶爲士其用刑可謂明矣猶曰欽哉欽哉况朕之眇末敢不盡心故常擇通恕之君子爲之讞議大理卿言爾明允詳刑罔不協中既已試功宜用遷陟爾其體朕之訓言終厥績焉可

荆湖南路轉運使衛尉少卿杜植可光祿少卿制

汝出於名家以才能自奮數更事任美績發聞惟湖湘之南薄于蠻徼蟠亘數千里汝爲部刺史相府上其課宜有遷次光祿古官維司少列凡南道之利害汝蓋以精心懇力講求之矣於朕之訓辭可略焉可

宗正寺丞制

先皇帝初即位時宗屬之在玉牒者才百人本支蕃衍結佩而仕朝者今餘八百員矣親疏之序隆殺之節有丞有卿以統之以爾器質端雅通於文理可用典治以

序九族祇率明訓以副朕之甄擢焉可

蘄州廣濟縣令張安雅等二人可著作佐郎制  
仲由宰蒲三年孔子入其境而善之今汝爲朕治邑亦  
三年矣而部刺史交薦其能夫吾民之所仰法者刺史  
縣令而已朕方將進循吏以懷吾民其可不爲之增秩  
耶可

華州下邽縣令李元瑜等可著作佐郎制

詩有之芄芃棫樸薪之爇之言賢者多而國家得以採



用之也夫萬官之列于下猶山木之蕃茂廉按牧守之  
臣歲得以擢其高第者進補於朝惟爾等履忠樂職  
皆以高第聞宜疏優澤俾佐祕省所以申棫樸之詠而  
爲國家之用也可

西頭供奉官常用之可右清道率府率致仕右  
侍禁李襄可率府副率致仕

古之仕者量其可任則受至於不能而止所以遠殆辱  
也朕嘉斯人之徒故於謝事而歸者必增秩以遣之往

欽茂恩以安末路可

內殿常班永寧寨都監石炳可內殿承旨制

爾奮身于絕塞之地以乘一障圖忠報國真壯士也訓  
兵秣馬戎備以修考之成績宜用醕賞勉厲武節以遲  
爾之來效也可

內殿崇班梁從政可內殿承旨制

某以強敏見稱通于戎務久次內朝厥有的効稽之官  
簿宜在陞秩往承詔旨汝惟欽哉可

兵部員外郎天章閣侍講知諫院傅卞可寶文

閣待制制

惟予之仁祖皇帝以人文陶一世雲章炳炳下燭乎萬  
物藏之內閣以與夫伏羲堯舜氏之遺書並傳乎無窮  
宜得閎雅敦敏之士以需詔命具官某禋身檢行不愆  
於義勸講金華授學有師法與於諫列數進忠言蓋有  
夙夜挾維之勞首被茲選孰不爲宜惟其執經便坐發  
明聖人之義者則不易汝職可

劍南節度推官張士澄等可大理寺丞制

萬官之才豈朕一耳一目之可盡之哉然而卒所以能盡之者寄朕之耳目於岳牧連帥推而進之耳維汝修方宿業以廉治日顯薦牘交上可勿聽乎宜寵以廷尉丞以示我擇材之公可

陝州司理叅軍柳說等二人可大理寺丞制

本道使者曹元舉等言爾廉謹治官有善狀章下有司有司亦以爲績效明白如章所言可用進秩乃陞爾以

廷尉承爾其祗踐以稱我懋功之意可

高麗國進奉使可大理寺丞制

朕聞太蒙之人仁太蒙東方之國也爾等奉其國琛踰不測之海以集于此其忠孝之心其得於太蒙之仁者耶朕嘉乃誠俾有真命丞於廷尉仍賜腰章歸而佩之足以夸榮於遠人矣可

延陵縣令監原州折博務王頤可大理寺丞制爾以幹敏被薦掌貨於邊積幣通發歲用登衍第其成

課法應賞次丞佐卿曹是爲優渥往踐乃服益圖報塞可

國子監直講可大理寺丞制

太學有材之地必有英豪卓異之士羣處焉講之以詩書勸之以道德聳之以名譽至於成人而後已此國子先生之所職也某經明行修爲時儒師朝夕誨導厥功茂焉其選大理之屬丞以厲夫教育之勤可

常州司法參軍監汾州永利鹽監柳真公可大

理寺丞制

煮水爲鹽征而積之以佐元元之賦其可廢哉爾以幹  
潔謹司鹽筴美利增衍溢於萬鍾歲滿齎課薦者又言  
其能進秩廷尉庸非疇勞之公平可

河東節度推官胡朝宗可大理寺丞制

才能之士落於郡縣猶遺金之在通衢俯而取之其有  
不顧者耶如汝之學通行周動而敏於事自帥臣而下  
薦書交屬乃用廷尉丞以勸其功朕之此授可謂得士

矣可

永寧軍判官鈕華國可大理寺丞制

荀子稱賢能者不待次而舉以汝之才實暴炙於羣士間奚須曠日月而后進耶蓋甲令所著必其考言試功乃得以遷秩焉然而士之絕蹤而遠到者莫不由此而進則汝之奮翼騰上蓋亦自今日始焉可

刑部法直官夏侯圭可大理寺丞制

刑部以汝持議明恕懼文法者皆稱其平已閱再歲請



賜以優秩此故事也宜陞之廷尉丞夫子公爲郡法曹  
陰德乃逮于子孫况其寵祿之及身者庸可辭耶可

合州巴川縣令張仲容等二人可大理寺丞制  
有地方百里以行仁政此仲由冉有之事而汝等皆爲  
百里長廉達信愛其民宜之賚其閥閱以上有司謂當  
遷秩顧朕何所愛哉將以勸夫善爲政者耳可

山南西道節度推官孫亞夫可大理寺丞制

真宗皇帝時嘗較天下士以汝祖暨爲第一及仁宗臨

試汝又中甲科何其不相遠耶然汝父暨早世以歿未能究其功烈今汝方發其軻而馳未見其止也則汝祖之志儻可以伸乎可

虔州信豐縣令鄭晉獲盜可大理評事制

羣盜剽奪伏於林谷間汝親帥吏士以擣其巢穴績効明著合於甲令其遷廷尉六百石用疇其勞朕之賜賞可謂當功矣可

太常博士龐元英將屯田員外郎回授弟元直

光祿寺丞制

朕以汝父先帝之大臣既已淪謝乃均其遺澤以及諸子而汝兄篤於友愛願上一官易以授汝朕何有不從哉將以成汝兄之美志爾可

大理評事朱初平可光祿寺丞制

汝以文得雋擢次科甲主畫幕府尉有成績進見庭下稍遷京寺丞佐司宰厥維茂恩勉爾清修以需光顯可祕書監可左散騎常侍制

天子之乘輿出則以散騎陪乘處則以散騎侍左右故屬車之間便殿之燕未嘗不與散騎游也所以聞正言見正道將成乎聖德朕之初御天下思得賢者與之游其不爲慎東耶具官某潔白高雅飾之以儒術至于華髮玉節不渝向處祕府典治圖籍有考合校讎之勞朕甚器之其以左貂金蟬隸於門下以侍宸極昔文王有四友孔子曰自吾得回門人益親則朕之命爾亦將爲左右先後也可

追官人孫亢等二人可文學制

爾忽于官箴自底于罰已更赦令與之自新稍遷散秩以觀其後可

靈臺郎制

荀子曰天行有常不爲堯存不爲桀亡然則日月之經會天星之隱見至於虹蜺冠珥凌蝕之變不可不察也其官某考步天路窮其精蘊占測祥祲咸有經驗稽其歲勞可用遷次靈臺之正俾之專領可

原州司戶陳汝玉可司天監丞制

禋祀言鄭火子產以爲人道邇則朕奚取於占天者哉  
誠不欲廢薦者之論俾之奏伎聊觀其所學爾因能授  
職蒞於太史必先正名茲非爲政之要乎可

曹登曹煜並可太常寺奉禮郎制

朕舉天下以養皇太后猶歉然懼不足稱而况外家之  
親以時加澤其可獨靳哉屬朕誕辰萬國蒙慶其以皇  
太后近屬二人陞秩京寺以表朕烝烝大孝之道焉可

太子太師致仕張昇奏醫人張舜民可國子四  
門助教制

朕之舊德之臣言爾習于黃帝俞跗之術以一命將  
旌其能可不聽哉國庠試職爾維祗踐庸示我之優恩  
焉可

晉州醫博士武泰等二人可國子四門助教制  
日者下書以搜能醫守藩之臣以爾治術頗精疑可以  
應詔既以名聞何愛一命不爲之甄采耶可

殿中丞張太寧可太常博士制

博士爲泰官常擇通古今者處之今雖以次陞然非詞學中科則猶不得與焉有司比課言汝以文取勝蘊藉有雅才閱其治實應法可遷夫爵祿公器惟能者得之勉爾職業豈特爲博士而已哉可

翰林醫官少府監宋永昌可殿中省尚藥奉御制

汝以醫名家而精於金匱玉版之術久籍禁林稽其治



驗蓋一二之失者鮮矣以事制祿其遷以殿省六尚之局益修汝職用祇服我寵命可


職方郎中馮沆致仕一子可試校書郎制

爾之父以忠潔自修白首不懈引章抗言請佚其餘年詔音財及而奄已淪謝加賜一子庸示朕之茂恩可

敦遣人韓盈可試校書郎知縣制

勅吏言爾行義甚高鄉里師之善積于家而賞行于朝古之道也其以某試蘭臺校書爾其勉敦不懈以師其

民俾至於爲善而後已則於時豈小補也哉可



欽定四庫全書

集部

鄭溪集卷四至六

詳校官庶吉士臣馬履泰

檢討臣何思鈞覆勘

謄錄貢生臣郭墉

謄錄貢生臣王穀

謄錄監生臣鄭啟緒

欽定四庫全書

鄧溪集卷四

宋 鄭獬 撰

制

三司鹽鐵副使衛尉少卿陳述古可光祿卿充

河北都轉運使制

大河之北蟠亘數千里北與匈奴接雖無事時束其弓  
甲而藏之然官吏有治否糧餽有虛實繫於一道可無  
督視廉按者哉具官某名家之雋高材勁邁事無劇易

沛然而有餘遂用佐吾太農以蕃衆貨海王之國厥賦  
出焉按籍疇庸俾陞於大僚維是北道皆以屬汝攬轡  
而行朕何爲而顧憂哉可

天章閣待制可都轉運使制

漢之麒麟天祿以藏圖籍於內禁令實中祕之書悉貯  
於天章閣博求道德經術之士以待制命茲實儒林之  
佳選以爾辭學中科治行明茂嘗任諫列數進忠言有  
仲山甫補袞之美遂用佐吾大司農以計國用財貨流

行厥政用乂疇庸有典乃陞爾以圖籍之選夫關隴之  
右宿兵數十萬拱手以待哺爾其爲朕將漕以飽吾師  
仗節而西吾何爲而西憂哉可

逐使人高師說可檢校水部員外郎深州團練  
使制

朕既即位解其衆故思與天下更新於其敗累而失職  
者皆得敘進於有司而加之秩命則於汝之久斥其可  
獨遺耶可

莊宅使康州刺史折繼祖可本州團練使制

折氏世爲守臣以障西夷忠孝顯著編在令甲乃祖乃父咸被褒寵今爾繼祖開爽有計數控服部族偃旗而息先皇帝時既有俞命而使者剡章又列其治效請賜爵秩服維先皇帝之俞命敢不恭承哉夫不規近利以存遠略此正汝之所務而朕之所取也勉終來譽以嗣汝之先烈可

秦鳳路鈐轄左驤使向寶可皇城使再任制

魏侯廟廷之饗上功席前行次功席中行無功者處後  
秦人奪氣不敢窺西河者以賞罰素具也幕府言爾提  
兵絕塞明習事機艾旗斬馘數履行陣更書甫及宜有  
以褒擢朕甚嘉之增秩留任併示醕庸爾其率勵壯猷  
行取銘鼎之勲奚特饗於前行而已哉可

京苑使王易可皇城使制

朕列師屯於坤維擇爾爲之偏帥其行也進律一等以  
爲戎列之雄維爾之明果夙建武節屢擁麾符咸以治



績聞今付以蜀郡之兵兼護西道蓋亦重矣夫威克厥愛乃能濟務董齊士衆爾其勉之可

內藏庫使曹佺可皇城使制

朕聞曹冀王用兵破數大國而不妄殺一人故其子孫蕃大佩紱而朝者比諸將之家爲尤盛非陰德之然耶惟爾忠謹自脩涖官稱治重以母后之近屬累日計勞遂冠乎使列然則大勲之後自以材能不獨以外家私恩進秩也可

皇城副使石守正可儀鸞使制

羣司之置使所以宅才武之臣序遷次而明陞黜與夫  
尚書諸曹郎相等用課最而至此者亦已爲通顯矣以  
爾祇靖愿慤赴功以敏比課於有司法當增秩躡等而  
進庸示我之嘉寵可

皇城副使知安肅軍兼權兵馬鈐轄張德志可  
儀鸞使仍落權字制

易水之南敵之往來道設障屯師以塞其衝汝用才武

被選俾守其軍壁畜馬訓士邊烽不作蓋勤已久矣朕方圖汝功而引章自言按籍增秩庸正使列勉力殊績以取不次之賞可

宮苑副使兼閤門通事舍人鄭餘懿可西上閤門副使制

朕日御法宮以朝大丞相及百執事而閤門諸使列侍於紫庭之下以贊其進退拜跽陟降之數濟濟翼翼其有儀也哉具官某出於名胄蔚有才美久服禁省習貫

乎朝廷之儀朕圖爾勞俾介諸使列而四方之侯伯及蠻夷荒忽之君時而來享亦將以觀禮矣爾其慎哉思稱厥職可

元贊責授崇儀副使制

連兵拒敵遂能寡旗而勝者非郡帥之合謀共力而成耶而汝早以忠勤勇奮收功於蠻徼已嘗經吏議廢官之久方且結綬而復進又以不協聞豈其未思耶昔之引車以避怨者蓋先國事而後私仇爾其遠鑒古人之

烈以自圖焉可

宗儀副使荆湖北路駐泊王知和可六宅副使

制

荆楚之間剽疾而易擾今雖弭伏無事而於湖之北常屯勁兵以壓其未萌乃以汝風力開壯往護其師既已就職士氣增倍鈞考功狀宜有以進秩勉圖忠績朕豈久滯汝於遠方哉可

勒停人賈師雄可如京使制

日者付汝以邕管抗辭不行於時獠奴窺邊方責任於  
守臣遂挂吏議己更癸酉赦令言者又稱其材不宜久  
擯於田隴間朕亦惜之其還汝舊服將究其用夫國有  
騏驥之馬以一蹶而遂弗乘者非知馬者也今取而乘  
之矣奮轡疾馳亦惟汝之致力焉可

左藏庫使張承衍可文思使制

某出於公侯之後不溺於流俗恭以持位敏以赴功大  
河之衝往護師衆今有司會課於歲當遷陞之使名用

伸寵擢勉爾壯猷用明我之嘉惠可

左藏庫副使三陵都監馮易簡可文思副使制  
諸陵園寢皆有令長而都護之職按行守衛以督不恪  
汝掌其治今已歲成松楸茂遂藩垣完葺亦能舉其職  
矣躡等以遷用酬爾之嘉績可

西京左藏庫副使梁寔可文思副使制

存則竭其能沒則撫其後此古之褒元功繼絕世以爲  
內恕之至也維爾之父著籍中省歷踐有勞今其淪亡

遺章徹聽請澤加於爾我有茂恩逝者不昧亦知朕不忘其家世也可

西京左藏庫副使冀德可文思使制

勅自關新疆戰多屢上護輸效級復應優科躡進使聯時惟厚賞盍圖報稱更懋功名可

西京左藏庫副使劉宜孫服除可舊官制

士大夫當擾攘時捐家徇國故以墨衰從事今四海內外無鳴弦之警則金革之士有親喪者皆得釋位而去



取以重風化之本而伸孝子之志而爾以才武在列護  
兵於常山遭罹內憂銜恤三年亦可以復籍矣還爾舊  
次勉奮忠力以圖其報焉可

文思副使柴貽忠可左藏庫副使制

揚子雲稱真偽實則政核然則考績者所以實其真偽  
者也爾忠謹自顯服於武事蓋有明效載在閭閻苟無  
褒進則何以示吾考績之公哉可

文思副使青州駐泊于莘可左藏庫副使制

列使之有介視命居次乃如文昌外郎累闕閱而至此者豈非美官哉爾廉能顯幹通習戎政駐兵藩府士卒豫附樞庭言其歲次可遷左帑增秩往拜嘉命虞氏陟明之典於是乎在可

秦鳳路鈐轄康慶可供備庫使制

朔騎之不踐吾境驚擊之士無所暴其材則外閫之屬帥能以畏愛循治之亦足以有功矣閱歲已久計茲闕閱之最宜用遷秩爾其修斥候明約束無恃彼之不來

得非善師者乎可

內殿承制渭州都監趙元張濟可供備庫副使

制

齊莊公設勇爵以褒驍雄先鳴之士今朕之名使列亦  
所以待材武之臣維爾忠力致果有志於事功數護戎  
律訓濟有方比其歲功宜有褒進勉圖報塞以明我勇  
爵之得人可

內殿承制鎮戎軍巡檢趙元可供備庫副使制

爾以忠愿沈壯護兵於近塞以爲支軍之帥於其無事  
時能簡練約束俾麾下之士常若大敵之至固可以書  
最矣夫履平則見功難要險則爲效速奚必屬韃躍馬  
推白刃而蹈之然後議遷乎可

右衛大將軍致仕李繼忠男守仁可供備庫副  
使制

耆艾之臣引年而家居豈無優澤以成夫去位之美者  
哉爾父某既以解紱得遂乎安佚露章來上請加賜其

子可無從乎列使維介躡次以遷爾惟佩服忠教無忘延賞之慶可

客省使制

由閤門使而上至客省使結綬而列大庭者謂之橫行非若羣司有使可計級而至也以爾端敏開濟治兵有文理久委戎節暴見功烈今又登最可用以掌客之秩恩優爵厚汝惟務稱其報可

中書舍人可宣州觀察使制

漢以丞相史出刺郡國後爲部刺史以六條察二千石  
之不法者則今之觀察使蓋亦源於此乎淮海之域古  
丹陽之地長山大湖挾維左右必得文章侍從之老以  
爲之師帥誰其尸之無以易汝某官某純德興學擢之  
西掖典治辭命之行風飛雷厲俾朕號令能信於天下  
者惟爾之能宛陵易帥乃以魚符犀節俾奠南土昔吾  
丘壽王爲東郡都尉年歲不熟多盜賊璽書讓之以爲  
不稱在上前時以汝廉明慈惠必能綏服江表朕將以

璽書褒美之以詘夫漢武侍從之臣出守而有不能者  
焉可

觀察使可節度觀察留後制

古者擇諸侯之賢者以爲方伯故屬有長連有帥卒有  
正皆所以考察諸侯而爲之黜陟則今之觀察使蓋源  
於此乎某官某長材大略勇而有義提兵捍邊士卒豫  
附歷補雄藩尤著風績朕將究其才用以遂功業披圖  
列地莫如宛陵其以龍節麟符往帥西土欽哉按部一

道無忘方伯之職焉可

駙馬都尉可越州觀察留後制

先皇帝以汝敦敏質重雖出於鼎門而有古寒士之操  
重以章懿之旁屬遂屬以愛女肆朕之初德澤漸於四  
海况其藩戚者哉廉車舊節改奠淮康而御史堯俞以  
爲賜薄宜如本朝故事章下丞相亦以爲宜如御史章  
宣惟丞相御史之爲言蓋朕所慊然者亦久矣其以會  
稽之節俾爲留務上以副先皇帝念親之意下以慰言



者之職朕亦釋然無嫌矣可

東上閤門使果州團練使李定可遙郡防禦使

制

防禦使主治兵師以折衝乎四方雖不賜旄鉞蓋亦古  
之連帥之職焉以爾忠勇有謀臨事而斷屬茲遴選俾  
總戎於關南就部之初吏士增氣今樞府又言其功狀  
計歲校能宜居此美秩夫邊防之機忽如脫兔謹之持  
之思稱我褒嘉之意焉可

如京副使閤門通事舍人石宗尹可南作坊副使制

大昕而朝臚傳乎紫庭之下俾予之列辟進退拜立翼而有儀者維爾之能樞府會其課閱歲宜遷維使介於武爵差高仍職上閤俾宿業焉可

兩府制四首

門下太一躡階天柱乃三公之象端門左掖東蕃居四輔之星維皇極之建官憲乾文而列耀若時雋老久緝

庶工雖高鼎席之勲未冠槐庭之拜揭茲魁柄屬我宗  
臣具官某德表碩膚智資大雅茂山甫將明之業遵平  
陽畫一之謀自踐疑丞再罹艱棘截然獨立倚以爲平  
議不旋踵而王室安計不移晷而天下定億載之期彌  
紹太平之望將符顧虛位於冢司尚屈尊於次輔褒章  
爲晚羣聽以疑舍舊德以弗圖殆元勲之無勸宜煥大  
庭之號載陞祕殿之嚴俾正上台永綏帝載於戲文武  
是憲久資申伯之謨堯舜其心更祝阿衡之志弼成大

化以格休期可

門下帝尊六相大封爲司馬之官周建三公呂望乃太  
師之職惟天兵之密議兼相府之開禁我有耆朋實孚  
異數籌講帝文之化暴揚神武之威宜誕綸言進登袞  
路具官某沈機善照偉度絕隣投刀無大猷之難決策  
若建瓴之易在昔烈祖已擢冢司掃聚螳之妖氛格安  
瀾之嘉治再魁宥密旋復艱虞大雪周年識寒松之獨  
茂疾風搏海知勁草之不傾載錄懿勲特揚褒冊進上

公之袞服開大國之苴茅功號加隆食封增行於戲上  
將上相天官所以面朝宜民宜人君子於焉受祿兼寵  
名之至渥優哲輔以能膺對掌國鈞永綏王室可

門下古者講仁義以訓師尊詩書而謀帥濯征淮浦則  
召公由是燁其威薄伐昆夷則南仲於以奮其武宣貴  
乎扛鼎抃牛之絕力必資乎輕裘緩帶之深謀祭遵所  
以雅歌臨戎安石所以弈碁制勝茲有雋老夙蘊壯猷  
載築齋壇俾專將閫具官某傑才絕出賢業素優試之

以疑而愈明擾之以繁而益辦老於器使爛著能名勁  
節自完足以當漢庭之大事沈謀不再足以破朔騎之  
先聲眷秦谷之价藩控西羌之右地戎車千乘鐵馬萬  
羣無如老成付以方面賜許田之帥節護隴北之師屯  
於戲後有纛旄前有鈇鉞恭於命則有明賞慢於令則  
有顯誅用此勵於三軍遂可圖於百勝無隳兵律以暢  
皇靈可

門下仗鉞專征外則重齋壇之拜秉鈞熙載內則專宰

府之司蓋文武之至權并勲賢之兼處咨余耆哲倚在  
藩維將震疊於皇靈宜褒華於異數具官某高才俊烈  
偉度沈雄計數燭乎著龜忠勳動乎金石夙專戎律嘗  
冠軍鋒草木服其威名龍虎祕其遠略擲緣謀帥首副  
僉言敞玉帳以建牙擁繡旗而行部獨居方面盡護屯  
師自將萬兵舉得伐謀之算不破一甲坐收靜勝之功  
邊燧絕煙胡馬遁迹宜甄茂賞以報膚公俾聯公鼎之  
榮仍領帥旄之寄於戲宰相國之柱石示鎮安於四方

將軍王之爪牙庶折衝於萬里寵名兩極嘉命併新副  
我疇咨勉圖忠報可

知開封府制二首

開封典治京師其浩穰爲天下之極故其選任亦宜有  
才能之傑者乃勝其任焉某精敏廉白屢更蕃府奏刀  
游刃宵縻之間愈利而不鈍宜可以尹吾開封矣昔趙  
廣漢張敞輩爲京兆尹顯名漢世其後寥寥莫有能及  
者非夫浩穰之劇尤難其才者邪爾其奮勵方略無俾



前人之迹由此而遂絕焉可

漢析長安以東爲京兆以西爲右扶風以北爲左馮翊  
然俱治長安中雖號爲繁劇其地分而治狹則亦易於  
爲力矣今開封環京師千里之畿歸於大尹較之前世  
蓋亦難矣以爾廉明通敏所至有方略課爲諸郡最乃  
以延閣之清選往司內史昔趙廣漢嘗欲得三輔而兼  
治之以快究其能今爾兼治之矣其究明方略以攄廣  
漢之宿憤焉可

翰林侍讀學士右正言馮京改翰林學士知制誥權知開封府制

勅學士職清地顯而開封典治京師非夫忠厚仁恕而有文學政事之能孰可以任此具官某造行直方受材博敏踐更中外休顯有稱論思禁林尹正畿甸詢謀惟允其往懋哉可

知成都府制

真宗皇帝嘗用張詠守蜀有異政其施設方略後世莫

能更其法凡言蜀治者必以詠爲首由詠而來高才傑  
德之臣不少矣而卒莫能繼朕將圖之乃考羣臣之次  
以爾某嘗守江陵囂訟屏息元元便安再守金陵厥治  
如江陵觀其成績必能爲朕守蜀若夫西控戎落東湊  
中國其防兵杜漸之術詠已得之矣至於漸摩風俗俾  
之醇篤興行禮教躋之於君子之塗者爾其深思之茲  
朕所以任卿之專也可

參知政事吳奎可資政殿學士知青州制

舜咨十有二牧柔遠以安近此則治外之臣也九官濟  
濟共熙帝載此則治內之臣也在舜之世都兪俾乂疇  
賢德而進之豈重內而輕外哉具官某天資渾厚善建  
嘉謀游刃所投衆理必解初發策於大廷遂搏風而遠  
列薦登二府國所倚毗頃以親憂執喪草次以哀致毀  
羸疾癯然尚何櫻之以庶政不遂其安養者乎麟符虎  
節陞華祕殿俾偃藩於青社以輔相天下之業去而奠  
一方顧不易爲力哉汲黯雖病可以臥治爾其專精神

近醫藥補完靈氣期於壽康則朕之眷懷豈忘汝於外  
可

龍圖閣直學士吏部郎中唐介可樞密直學士  
知瀛州制

入則更直諫垣以嘉言鯁論闡切於上出則獨專方面  
以惠澤美政漸潤於下我有能臣履踐衆職茲有內外  
之效焉具官某事上以忠臨下以恕撓之以繁而見其  
斷試之以難而見其明治行燦然暴於衆聽俾直樞府

往帥乎南關夫北朝之事汝皆累黍而熟計之矣然政  
事修完常在閒暇時今遼遠之人沒齒不聞鳴鏑之聲  
可謂閒暇矣均爾賦役明爾法禁厲兵畜馬先事而預  
防之夫如是誰敢侮之哉可

朝奉大夫提舉杭州洞霄宮章衡可知滁州制  
勅某早以藝文亟更華要比疇勞久登列禁嚴而弗圖  
其終以墜厥服浸更歲月法應甄收起於詞館之閑錫  
以州符之重往欽厥止尚永無愆可

給事中集賢院學士呂溱可龍圖閣直學士知

杭州制

宣王之命申伯之詩曰我國爾居莫如南土古之擇國以授其臣顧不厚哉錢塘雄富甲天下茲實朕之南土汝嘗擁節而守之再以命汝得無宣王之意哉具官某材高行美蔚然獨秀富貴自致不爲權利所誅垂翅既久將有漸陸之進乃以延閣之拜俾往涖焉錢塘之故老喜汝之來壺漿相攜將爭道以候汝矣若是者朕何

爲而憂東南哉可

溪洞永晤可襲知富州制

南荒之險五姓所盤處而向氏屬州亦得世其爵今永  
昭不幸淪謝而羣議以汝爲代其可廢哉惟忠以事上  
惟惠以綏下無驚無肆以服我之休命可

知雄州制

朕之藝祖嘗任李允則守關南匈奴息謀不敢飲馬於  
長河朝廷倚之如伏百萬之兵何其得將臣之至此哉



故朕常思得如允則者以爲關南守以爾沈厚有謀爲  
五虎臣授律提師凜然有將帥之風必能爲吾安邊守  
境折衝方面之難庶乎朕有以繼美於藝祖矣仍進秩  
某官以寵其行可

兵部郎中知潭州制

昔黃霸守潁川詔令使民咸知上意今長沙之域土  
廣民稠比歲穀不登雖救長吏賑給其重困而德澤之  
政或未盡發以爾某廉潔守節明於治道嘗在豫章有

異等之效故擢以七兵郎俾牧長沙爾其寒者衣之饑者哺之道朕愛民之心於其下令知朝廷德澤之厚無有遠邇則朕尚何憂乎長沙也哉可

### 知洪州制

豫章據大江之西爲一都會陳蕃嘗爲之守解榻以禮徐孺子想其遺風餘烈固足以爲二千石師矣具官某清心以勵俗美行以表物按節右蜀課爲第一入佐計府肅然有餘今豫章更守屬在茂選進爾右曹以守鍾

陵爾其希慕先哲裁爲善政鍾陵賢士有如徐孺子者其薦諸朝朕將以東帛聘之豈特解榻而已哉可

樞密副使陳升之可觀文殿學士知越州制

鄭武公爲司徒緇衣頌其美此自外以入輔也申伯奠南國崧高歌其功此自內以出封也予之宥密碩德之老解機軸以開藩蓋有成周褒功之數奚出入之爲異乎具官某器業精深通於治國之體贊道樞極先帝所以倚屏逮予之初謀不旋踵而天下之業已定勲望益

高執德益下衷言懇懇請辭西府維會稽之甸邦湖山  
挾維乎左右壽親白髮採蘭而爲養是足以成其雅志  
優游而致樂矣文昌左轄兼榮祕殿出封加等是以成  
周之法焉可

登州防禦使向傳範可齊州防禦使知滄州制  
邊燧不作六十餘年桑果之畦交植於南北故於牧圉  
之臣朕常擇其忠厚有謀者付以折衝之任焉景城缺  
帥將圖其人差籍較能無易於汝具官某材高器閎有

將帥之略設施經畫動有美效今易其使節俾守茲土  
夫景城齊地也東負大海而北與匈奴接風俗渾厚有  
魚鹽絲枲之饒惟鎮靜可以懷殊俗惟明厲可以破姦  
黨足食足兵且使知教茲朕所以命汝之意也可

知廣州制

交廣之地距京師幾萬里其民俗與山獠雜居固未嘗  
見天子旗旄之美車輿之音則其聲教之所偃薄德澤  
之所漸漬由上國而施四方蓋亦有近者詳而遠者略

矣故朝廷常擇文武近臣爲之綏撫乃以爾俊老碩德  
智足以破羣疑才足以服不諛休聲茂烈著於衆聞付  
以麾符俾守南海爾其宣布我惠澤發明我威烈俾萬  
里之民涵仁泳義如在朕京師則朕何有南顧憂乎可  
戶部副使太常少卿燕度可右諫議大夫知潭

州制

湖湘之南溪蠻剽悍而易擾陸而馴之則亦弭伏至其  
失御遂出而噬邊其禍亦不細得無肅乂廉治之帥爲

之良牧者哉以爾具官某醇明忠厚通於世務更踐要劇芒刃愈出俾副大農厥功茂焉宜加賜諫議大夫魚符犀節往甸南服內以惠斯民外以柔殊俗朕方端床面朝以遲爾之奏課矣可

棣州防禦使知鄭州王仁旭可博州防禦使知  
滄州制

朕惟真宗皇帝以長轡遠御控服匈奴六十餘年灌其烽燧而滅之得善師不陣之術今無棣東瀕於海北與

敵境相踵可謂兵車四衝之地也屬茲謀帥考之羣公  
咸曰莫如某者沈勇忠實老於戎服可屬以疆場之事  
朕其俞哉夫安不忘戰治不棄兵爾其訓吏士謹斥候  
無恃彼之不來而恃我有以待之斯足以爲善守者矣  
可

慈州寧鄉縣令王良臣可河陽節度推官知洛  
州曲周縣制

汝以慈惠敏肅爲朕墨綬吏民皆宜之既有成績則當



敘進河陽大府也從事屬官也寵此新命而尚俾之治邑者蓋朕之美錦不欲使未學者製之耳可

同谷令李敦復可節度推官知乾寧軍乾寧縣

制

董生謂縣令民之師帥是自古未有遺民而可爲治者也爾以高第選爲邑長吏奉詔宣化薦者言其最程功考實稍遷以郡從事而猶與之邑者是不敢遺吾之民也可

郎官可赤縣令制

王渙爲洛陽令摘發姦伏京師疑其有神算及渙之去  
連詔三公選令皆不稱職蓋夫神州赤縣浩穰之都非  
神明之牧則不能致治以爾某清方以厲俗明斷以肅  
物更履事任而皆著美績郎闡久次衆惜其滯材今特  
試以劇邑批大卻導大窾非庖丁之刀不能解也昔子  
產謂惟有德者可以寬服人其次莫如猛爾其勉修厥  
德以務寬猛之中庶乎姦黨震慄而善人伸矣可

